

आकाशवाणी जयपुर-अजमेर  
प्रादेशिक समाचार।

दिनांक 29.05.2024  
समय: 18.45 बजे

- राज्य सरकार अणूती लू ने देखता थकां सफाखाना मांय जरूरी इंतजाम तैय करण वास्ते ज़िलां मांय प्रभारी अधिकारी लगाया।
- प्रदेश मांय अणूती गर्मी अर लू रा हालात सूं आज भी आम मिनख माथे घणो फरक पड़्यो-एक जून सूं हीटवेव सूं राहत मिलण री है आस।
- मुख्यमंत्री भजनलाल शर्मा जयपुर मांय पेयजल वितरण व्यवस्था रो जायजो लीनो।
- राजस्थान माध्यमिक शिक्षा बोर्ड 10वीं कक्षा रा नतीजा ऐलान कीना-नतीजो 93 दशमलव 03 फीसदी रह्यो।

000

प्रदेश मांय अणूती लू अर गर्मी ने देखता थकां सफाखाना मांय जरूरी व्यवस्था करण वास्ते सगळा ज़िला रा प्रभारी अधिकारी नियुक्त कर्या ग्या है। इण सगळा अधिकारियां नं तुरंत प्रभाव सूं संबंधित ज़िला मांय दौरा करण रो कह्यो ग्यो है। चिकित्सा अर स्वास्थ्य विभाग री अतिरिक्त मुख्य सचिव श्रीमती शुभ्रा सिंह ने बतायो के आ सगळां प्रभारी, अधिकारी आपो आप रे ज़िला मांय प्रभारी सचिव सूं संपर्क कर हीटवेव प्रबंधन मांय पायी जावण वाळी कमियां ने मौके माथे ईज निस्तारण कर रपट पेश करेला। वा बतायो के सफाखाना मांय हीटवेव प्रबंधन तैय करण वास्ते एक चैक लिस्ट भी तैयार की ग्यी है।

000

आखा प्रदेश मांय आज अणूती गर्मी अर लू रा हालात रह्या। इण कारण आम मिनख माथे घणो फर्क पड़्यो। लोग जरूरी काम होवण माथे ईज घर सूं निकळे है। थोडी सी भी लापरवाही होवण सूं लू रे असर सूं लोग बीमार पड़ रह्या है। इण कारण सफाखाना मांय उल्टी दस्त रे मरीजां री संख्या बढ री है। बिजली-पाणी री समस्या भी केई ज़िलां मांय बण्योडी है। प्रदेश मांय इण बीच सब सूं ज्यादा तापमान मांय 1 सूं 3 डिग्री सेल्सियस री गिरावट हुई है। पिलानी मांय काल रे मुकाबले पारो गिर र 48 दशमलव 2 डिग्री दर्ज व्ह्यो। चूरू मांय पारो 47 दशमलव 7 डिग्री सेल्सियस रह्यो। राजधानी जयपुर मांय भी लगभग आधा डिग्री गिर र तापमान 46 डिग्री माथे आ ग्यो। उठे करौली मांय अणूती गर्मी सूं लोग परेशान रह्या।

.....

चूरू मांय झुलसावण वाळी गर्मी सूं आम जन जीवन पूरी तरह सूं प्रभावित है। ज़िला प्रशासन अर भामाशाहां केई ईलाकां मांय तिरपाल, कनात लगा र छाया री व्यवस्था कीनी है। राजकीय भरतिया सफाखाना मांय बुखार उल्टी दस्त रा मरीज बढ रह्या है इण ने देखता थकां सेहत महकमो सतर्क है। जिला रा ताल छापर अभ्यारण्य मांय हिरण छीयां री तलाश मांय भटक रह्या है। अभ्यारण्य मांय तालाब रे कने कुछेक झुण्ड गर्मी सूं निजात वास्ते कोशिश कर रह्या है। बूंदी ज़िलां मांय लू रे साथै उमस सूं आम मिनख माथे घणो फर्क पड़्यो है। बिजली री कटौती सूं लोग परेशान व्हे रह्या है। सवाईमाधोपुर मांय दुपहरी पछे बूंदा-बांदी सूं गर्मी रो असर और बढ ग्यो है। जयपुर मांय भी भारी उमस अर गर्मी सूं लोग परेशान रह्या। बीकानेर मांय अणूती गर्मी ने देखता थकां पीबीएम सफाखाना मांय मोक ड्रिल कियो ग्यो। टोडारायसिंह मांय जलदाय मंत्री कन्हैया लाल चौधरी आज

सूरजपुरा फिल्टर प्लांट रो औचक निरीक्षण कीनो। वां इण सूं जुड्या अधिकारियां ने हुकम दीना के फिल्टर प्लांट रे रख-रखाव वास्ते जरूरी कार्यवाही की जावे। भरतपुर मांय आज सुंवारू सूं इज अणूती गर्मी रही पण दुपहरी पछे धूलभरी आंधी चाली। मौसम मेहकमां कह्यो की 31 मई सूं 2 जून ताई जयपुर, बीकानेर, भरतपुर संभाग रा कुछ एक ईलाका मांय आंधी बरसात री आस है। **मौसम** केन्द्र जयपुर रा निदेशक राधेश्याम शर्मा ने बतायो के प्रदेश मांय एक जून सूं हीटवेव सूं फुंकारो मिलण री आसा है।

अणूती गर्मी ने देखता थकां नागौर री सगळी आंगनबाडी मांय 3 सूं 6 साल रे टाबरां री छुट्टियां ऐलान व्ही है।

000

मुख्यमंत्री भजनलाल शर्मा आज जयपुर मांय पेयजल महकमां रा दो पंप हाउस रो औचक निरीक्षण कर र पेयजल वितरण री व्यवस्थावां रो जायजो लिनो। इण दरमियान वां पाणी सूं जुडी दिक्कतां री जाणकारी लीनी। श्री शर्मा रामनिवास बाग अर जवाहर सर्किल पंप हाउस मांय पाणी री व्यवस्थावां अर वितरण प्रणाली सूं जुडी जाणकारी लीनी। दोन्यू पंपहाउसां रे निरीक्षण रे पछे मीडिया सूं बातचीत करता थकां श्री शर्मा पेयजल महकमां री कार्यप्रणाली अर व्यवस्था माथे संतोष जतायो। वां कह्यो के जनता वास्ते कीणी तरह री पाणी री कमी नी व्हे ईण वास्ते मेहकमां रा कर्मचारियां ने जरूरी भळण दी गी है। साथै ईज गौशालावां अर पंखेरूआं वास्ते पाणी री व्यवस्था करण रो कह्यो गयो है। श्री शर्मा लारली कांग्रेस सरकार रे मार्फत दूजां राज्यां रे साथै बिजली ने ले र किया ग्या समझौतां माथे सवाल उठाया।

000

प्रदेश मांय अणूती गर्मी रे इण दौर मांय आ मिनख ने राहत देवण वास्ते राज्य सरकार रे हुकम माथे सगळां प्रभारी सचिव जिलां रे दौर माथे है। बूंदी रा जिला प्रभारी सचिव कुंजीलाल मीणा जिला सफाखानां रो औचक निरीक्षण कियो। निरीक्षण रे दरमियान जिला प्रभारी सचिव अर जिला कलेक्टर अक्षय गोदारा न्यारा-न्यारा वारडां मांय जा र मरीजां सूं बातचीत कीनी अर सफाखाना मांय मिळ रई सुविधावां रा बारा मांय जाणकारी लीनी। वां स्त्री अर पुरुष वार्ड, आई.सी.यू. वार्ड समेत सगळां वार्ड रो निरीक्षण कर सेहत अधिकारियां ने गर्मी अर लू सूं जुडी मौसमी बीमारियां रे समाधान रा सगळा बन्दोवस्त करण रो कह्यो। **नीम का थाना** रा जिला प्रभारी सचिव इंद्रजीत सिंह कलेक्टर कार्यालय मांया न्यारा-न्यारा अधिकारियां रे साथै बैठक किनी। बैठक मांय पेयजल, बिजली आपूर्ति रे साथै अणूती गर्मी रे दौर मांय लू सूं बचाव अर सेहत सेवावां माथे बातचीत कीनी। चित्तौडगढ जिला रा प्रभारी सचिव भानु प्रकाश एटरू जिला मांय पाणी अर बिजली आपूर्ति रे साथै हीटवेव ने ले र व्यवस्थावां री जाणकारी लीनी। सांचौर रा जिला प्रभारी सचिव नरेन्द्र गुप्ता माखुपुरा रा वाटर पंप हाउस रो निरीक्षण किनो। वां महकमां रा अफसरा सूं ग्रामीण अर शहरी ईलाकां मांय पेयजल री आपूर्ति रे हालात री जाणकारी लेवता थकां जिला मांय मजबूत पेयजल आपूर्ति तैय करण रा हुकम दीना। जिला प्रभारी सचिव धामणा रा 220 के.वी. ग्रिड सब-स्टेशन रो भी निरीक्षण किनो। वां सरनाऊ पंचायत समिति रा दांता मांय मनरेगा रे कामां ने भी देख्या। पंचायती राज महकमां रा शासन सचिव डॉ. रवि जैन झालावाड़ रा झालरापाटन रा सेटेलाइट सफाखाना रो निरीक्षण कीनो। चिकित्सा महकमां री कानी सूं झालावाड़ जिला मांय बढता तापमासन सूं बचाव वास्ते ओ.आर.एस. वाहिनी सरू कीनी है। आ वैन सार्वजनिक जगावां ज्यो के रेल्वे टेशन, बस टेशन अर सफाखाना मांय लगायी जावेला अर रोगियां रे स्वास्थ्य परीक्षण रे पछे जरूरी ईलाज अर दवाइयां देवेला। वैन मांय मेडिकल स्टॉफ री ड्यूटी लगाई ग्यी है। प्रदेश रा न्यारा-न्यारा जिला रा, जिला कलेक्टर भी बिजली, पानी अर सफाखाना री व्यवस्था सही करण मांय लाग्योडा है। सवाईमाधोपुर जिला कलेक्टर डॉ. खुशाल यादव कुण्डेरा सामुदायिक स्वास्थ्य केन्द्र रो औचक निरीक्षण कीनो। वा लू अर तापघाट रा मरीजां वास्ते एक अलग बार्ड री व्यवस्था मांय कमी बतावता थकां कूलर लगावण रा हुकम दीना। वां ए.एन.सी. कक्ष री व्यवस्थावां सुधारण रा भी हुकम दीना।

000

राजस्थान माध्यमिक शिक्षा बोर्ड आज 10वीं कक्षा रो नतीजो ऐलान कर दियो है। साथै ईज, व्यावसायिक शिक्षा अर प्रवेशिका रो नतीजो भी ऐलान कर दियो ग्यो है। इण इम्तिहान मांय लडकियां एकर फेर सूं बाजी मारी है। बोर्ड प्रशासक महेश चंद शर्मा नतीजो जारी करता थकां बतायो के 10वीं रो नतीजो 93 दशमलव 03 फीसदी रह्यो

है। वां कहयो के सैकंडरी परीक्षा मांय 10 लाख 39 हजार 800 सूं बत्ता परीक्षार्थियां हिस्सो लियो हो। इण मांय बालकां रो नतीजो 92 दशमलव 64 फीसदी जदके बालिकावां रो नतीजो 93 दशमलव 46 फीसदी रह्यो है। श्री शर्मा बतायो के बोर्ड एक ईज म्हीणा मांय सगळ्ळां इम्तिहान रा नतीजा ऐलान कर दिया है, इण वास्ते बोर्ड रा कर्मचारियां पूरी मेहनत कीनी।

.....  
इण बीच राजस्थान स्कूल शिक्षा परिषद, री कानी सूं आठवीं अर पांचवीं रा नतीजा भी काल ऐलान कर दिया जावेला। स्कूल शिक्षा शासन सचिव कृष्ण कुणाल शिक्षा संकुल मांय दुपहरी तीन बज्यां आ नतीजा ऐलान करेला।

000

प्रदेश मांय आज सूं 9 महीणा सूं ले र 5 साल ताईं रा टाबरां ने विटामिन ए री खुराक पावण रो अभियान सरू कियो ग्यो है। महिला अर बाल विकास विभाग अर चिकित्सा अर स्वास्थ्य विभाग री कानी सूं आ अभियान चलायो जा रह्यो है। आ खुराक 6 महीणा रे छेटी सूं पाई जावे है। इण वास्ते पूरे साल मांय 2 बार छोटे टाबरां ने विटामिन ए री खुराक दी जावे है। उटे, भीलवाड़ा मांय 2 लाख 63 हजार सूं बत्ता टाबरां अर अजमेर मांय 2 लाख अस्सी हजार टाबरां ने विटामिन ए री खुराक पावण रो लक्ष्य राख्यो ग्यो है।

000